

Tungod ni Jesus



Ni Elder José A. Teixeira
Kapangulohan sa Seventy

Sa Portugal, daghang mga tawo mopahimutang og usa ka talan-awon sa pagkatawo ni Jesukristo. Inyong makita ang mga eksena sa Pagkatawo ni Jesukristo sa tibuok nasod atol sa Pasko.

Isip usa ka bata, ganahan kong mopahimutang og talan-awon sa Pagkatawo ni Jesukristo. Matag Pasko, mokuha kami og usa ka kahon nga kahoy. Puno kadto sa gagmay nga mga figura sa mga tawo, mga balay, mga mag-uuma, ug mga hayop. Makakita kami og presko nga lumot, dagami, ug mga bato aron maka-mugna og gagmay nga bungtod, mga walog, mga kahoy, ug mga umahan. Mogamit gani kami og tipaka sa bildo aron murag og mga suba ug sapa tan-awon.

Maghimo kami sa talan-awon sulod sa mga adlaw o mga semana, usa ka piraso sa usa ka higayon. Ang labing importante nga bahin mao ang pagdugang og mga tawo gikan sa istorya sa kasulatan. Kami mobutang ni Maria, Jose, sa mga magbalantay sa karnero, mga anghel, ug sa uban diha sa sentro ug isugilon ang mga istorya mahitungod kanila.

Kon moabot na ang adlaw sa Pasko, among ipahimutang ang pigura sa bata nga si Jesus diha sa pasongan. Dayon among isugilon ang mga istorya mahitungod ni Jesukristo. Among hisgotan kon sa unsang paagi Siya ang labing mahinungdanon nga gasa sa tanan tungod sa unsay Iyang gibuhad alang kanato. Naghatag Siya kanato og kalinaw ug paglaom. Nagtabang siya kanato nga masayod kon kinsa kita ug nganong kita ania dinhi. Mogiya Siya ug mohupay kanato.

Tungod ni Jesus, kita makapaambit sa atong kaha-yag. Makahatag kita sa uban og gugma, kamabination, ug serbisyo, bisan kon gibati nato nga kita adunay gamay lang nga ikahatag. ●

Adapted from "Christmas's Greatest Gift" (First Presidency Christmas devotional, Dec. 4, 2022), Gospel Library.

MGA PAGHULAGWAY PINAAGI NI BROOKE SMART



Pangitaa Kini!

Makita ba nimo ang nakatago nga mga butang dinhi niining hulagway sa Pagkatawo ni Jesukristo?

